

四庫全書

集部

欽定四庫全書

明詩綜卷九十一

翰林院檢討朱彝尊編

方澤六首

方澤字雲望號冬谿嘉善人秀水精嚴寺僧有

冬谿内外集

彭子殷云嘉靖開士以善詩鳴者三人谷泉福玉芝聚西洲念冬谿

子與之倡和古體上仿漢魏而律一以初盛唐為準晚乃旁溢稍及於錢劉皇甫諸家然力以繩墨自維語涉纖險輒損去之猶法吏之慎守三尺嗜古者不以瓦缶雜鼎彝也

靜志居詩話冬谿詩格清純不雜偶
語宜為唐應德方思道屠文升所稱

古意

孟冬風始寒鴻鴈凌晨飛疇昔嘉樹林枝葉日以稀一
隨氣運變誰能覺其非賢者貴特達在遠諒不違君看
松柏姿歲晚長依依

御月樓夕眺遲將白灘不至

飄風鳴軒櫺落葉辭高柯薄暮登層樓伊余心未和悠
悠遠天雲泛泛清川波去者曾莫留來者奄忽過千秋

旦暮事百歲寧足多但願狎所親歡至相與歌幽人期
不來奈此涼月何

送范菁山丈之雲南大理

北望雲霄迴南征道路長山逢驅象客地入卜雞鄉碧
海常飛霧青林不隕霜聖君勞禦遠非是漢文皇

送王翰林柘湖轉比部還京

滄海有才名青春賦兩京乍辭金馬署復作爽鳩行苑
柳深袍色宮鶯雜珮聲君王前席問應是為蒼生

寄平野上人

惠朗南歸後空山兩月過青春看已暮白髮近如何雨
外鶯聲遠風前柳絮多遙知清夢裏還繞舊烟蘿

仇生

仇生有父風能畫擅江東縹緲千峰勢巔屹尺素中坐
增吳苑秀不謝輞川工儻寫天台勝添余補衲翁

祖福二首

祖福號谷泉秀水龍淵寺僧後居無錫九龍山

雨宿西閣

浩蕩迷方客人淹江寺隈
旅愁添夜雨歲事到寒梅
滄海無家問中峰有夢回
燭花爾何事更傍客杯開

人日

鴛鴦湖頭新水生白龍祠前風日晴
梅花作意開自好
柏葉向人殊有情
南國十年多羽檄
北山此日有柴荆
杖藜物色總春事
回首江湖眼獨明

正念一首

正念號西洲秀水龍淵寺僧

燕京春暮寄山中人

鳥鳴不鳴山靜花落未落春遲美人如雲天際芍藥空
留一枝

法聚二首

法聚號玉芝嘉興人始居海鹽資聖寺後隱武

康天池山有玉芝內外集

吳山秋望呈張侍御

子胥廟前江日晡
越王城頭雲有無
故宮臺榭幾黃葉
南渡寢園今綠蕪
長笛關山瞻北固
清尊魚鳥傍西湖
蕭蕭落木蒼郊外
幾處寒烟破屋孤

江邨

殘陽在木末
遠鳥沒孤嶼
漁舟歸未歸
吹笛芙蓉渚

圓理 三首

圓理號雲東
嘉興人出家
天寧寺有雲東集

林居雜言寄同志

芙蓉謝春華
鴛鴦念匹儔
崇蘭委深谷
杖杜生道周
萬物各有時
百川無倒流
感之傷我懷
端已義所仇
顧瞻遠行客
誰肯結綢繆
請為林壑交
得與爾同游
終歲混樵牧
聊以忘世憂

慈雲嶺

仄徑攀蘿轉空山
伐木聞兩崖
危石抱衆壑
細流分曉竹
含蒼靄
春田護白雲
回看萬松裏
唯有鹿麋羣

招友人看芙蓉

一水澄於練孤芳錦作叢故將遲暮景開向寂寥中夕
露垂秋白江霞媚晚紅薄言方採掇持贈故交同

明周 一首

明周號嬾雲潞安人居法住寺

送人還壺關

林花未吐怯輕寒人在天涯送客還千里好山迎馬首
白雲飛處是壺關

明曠 一首

明曠字公朗崇德人住西林寺

秋興

大火倏以逝涼颼動幽林飛霞騁奇姿孤桐落秋陰願
言縱芳躅擘秀歷遙岑高視破宇宙曠焉開我襟靈籟
妙徵羽何必筑與琴感此事愉悅聊復送長吟之子出
世者俯仰增遐心

戒襄 三首

戒襄字子成號平野海鹽天寧寺僧有平野集

長安壩上河道中

三月臨平山下宿沙棠一舟帆數幅清晨鼓枻看山行
兩岸垂楊春水綠岸上人家挂酒旗幾樹桃花映修竹
路人問我將何之我欲尋師向天目

杜鵑

夜向吳山宿朝從越嶺飛年年春欲暮催客淚沾衣樹
冷悲殘月川長怨落暉花時無限好猶道不如歸

曉過橫塘

半幅蒲帆九里汀
石湖秋水接天青
舟人指點蘼蕪外
一帶遙山是洞庭

果斌一首

果斌號半峰嘉靖初住持天界寺有半峰集

顧玄

言云半峰詩多成於中夕沉思苦索而後得之
對客揮毫非所能也正如南能腰石碓米已熟

但欠
篩在

詩話半峰少從顧華玉
游而詩未得其一體

王十岳山房

小隱空山絕四鄰
野雲孤鶴自相親
誰知一徑深如許
猶有敲門看竹人

宗倫一首

宗倫字性彝
芝溪人有覺隱遺風集

旅懷

東吳隔千里
歸計尚茫然
忽見梅花發
他鄉又一年

德榮一首

德榮天台僧

題國清寺

竹院深深近翠微
短簾容易墜斜暉
香殘瓦鼎僧初定
月上松巢鶴未歸
落澗祇供煎茗水
洩雲留伴坐禪衣
客游正值春將半
風落桃花片片飛

洪恩二首

洪恩字三懷上元人居長干寺有雪浪集

過安民卿秦淮寓館

安期東澥至暫向白門居
綠酒稱從事紅妝用較書
舟

移淮水月饌出晉陵魚聞道西林勝能無一榻虛

中秋日問主人病

十日佳期踐山園半畝宮雨收殘暑盡月出大江空背
屋一亭竹當門幾樹桐我來憐病榻數問主人翁

德清四首

德清字澄印全椒人出家南京報恩寺尋入五
臺棲牢山坐効逮繫戍雷陽卒于曹溪有憨山
夢游東游等集

贈王德操

楚人疑鳳鳥仲尼愛麒麟豈不為世瑞所遇非所親耳
目素不接誰能辨其真之子抱奇思翩翩邈風塵迷方
日已衆微言難具陳撫膺發長歎衷曲誰為信出關豈
慕遠遯世甘沉淪良由知者希所以稱至人

抵雷陽戍

二首

舊說雷陽道今過電白西萬山嵐氣合一錫瘴烟迷末
路隨蓬累殘生信馬蹄那堪深樹裏處處鷓鴣啼

萬壑奔流下千山積翠連帆飛五嶺驛猿挂九秋天客
路浮雲外鄉心落日前三吾生猶未定江漢是餘年

題畫

風雨孤舟夜微茫草樹春茅簷驚犬吠定是渡江人

真可 一首

真可字達觀吳江人一云容世號紫柏大師有茹

退集

詩話吾鄉楞嚴寺建自宋嘉祐八年至嘉靖間
為勢家所占紫柏特興復之先從祖君升諱大

猷經營規度象設皆治銅為之佛書三藏易梵
夾為方冊鏤板貯之徑山流通宇內既而游大
房石經山進隋僧淨琬所藏佛舍利慈聖太后
迎入宮中特賜紫伽黎俄而妖書獄起辭連入
詔獄死集中吳氏廢園作蓋即楞
嚴寺基先叔祖中萬厯壬子舉人

吳氏廢園

汾陽門第晉風流縹緲吳山感勝游今日松蘿誰是主
斷雲殘月鎖江樓

通岸一首

通岸字覺道南海人居光孝寺有栖雲菴集

曹溪雜詩

為愛溪山好無人祇自看萬峰青不斷三月雪猶寒乳
鹿藏深樹飛鳬過遠灘興來誰與晤長嘯碧雲端

法生一首

法生字化儀崇德人少林寺僧後居徑山

寄雲東

十年滄海共離羣三月風塵信未聞芳草閉門春冉冉
落花啼鳥暮紛紛歲華江上看流水世事人間喻薄雲

鴈宕天台何處所采芝捫葛幸同君

傳慧一首

傳慧字朗初寧波人居延慶寺

夜渡揚子

空江信淼茫月出水生光入浦潮如雨沾衣露欲霜天
清沙氣白夜靜澣雲黃漸覺鐘聲動應知到上方

智觀一首

智觀字止先號蔚然江都僧雪浪弟子居吳興

雙髻峰有中峰草

山居漫言

板屋黃茅爛裊禪已十春更無孤鶴伴且免衆狙嗔天
地寧私我谿山不假人四分僧律在吾自率吾真

大壑二首

大壑字玄津杭州淨慈寺僧有吳詠

上方寺遲同游不至

湖光斜遠寺松影曲藏關颿過烟中樹僧歸雨外山井

梧秋更老橋蘚晚逾斑目極天涯盡扁舟不易還

蓀谷

曲磴餘蒼蘚危梁度碧雲山深溪屢合樹密徑斜分
佛火寒猶見僧鐘書不聞空留爭席處野老自為羣

通潤一首

通潤字一雨吳人居常熟有秋水菴集

將歸簡三如學公

曉起春寒甚思君巖上廬當門雪幾許倚杖興何如不

日理歸櫂無人傳別書臨行重相憶先此寄雙魚

斯學五首

斯學字悅支號庾山海鹽慈會寺僧有幻華集

詩話庾山詩格清圓句如薄衾寒入夢細雨遠
沉鐘白雲非舊主黃葉自前朝客來黃葉雨鬼
嘯白揚風太原山繞中條近小有天通上界寬
均有幽致禪藻集載某居士稱之曰清冰勵操
栗玉明襟韻似道林不屑養馬才
優無可不愛除官可云賞譽之至

雜詩二首

落日迫西崦吐月銜東島逝景故悠悠人世漫浩浩所

思耿中情憂愁慙如擣宴會苦不常容顏徒自老子有
鼓與鐘勿伐亦勿考一委溝壑中身名同腐草

披雲卧丘壑凌風稅籠樊芳節忽已邁朱明照前軒嘉
樹滋以綠幽草萋以繁丹藿耀庭戶黃鳥啼林園俯聽
石潭響仰視高崖瞰佳期託縣圃遐想踰崑崙臨川有
長歎冀與智者言

秋夜與羅吉甫同賦

夕露鳴蟋蟀秋風動楊柳嘉候苦不常芳華詎能久真

境總會心萬理弗挂口寫此石上琴醉以山中酒

寄吳少君山人

知君好芳草荷芰半衣裳一別春山綠幾經秋葉黃海
門生片月江寺送殘陽曾有天台夢相攜度石梁

邊城晚眺

獨上層樓望欲迷滿城砧杵更悲悽河流曲抱內黃北
山勢遙連太白西落葉亂隨秋雨下斷鴻斜引夕陽低
自來幽朔寒偏早繞樹啼烏未肯棲

寬悅 一首

寬悅字耀鶴南京人居普德寺有堯山藏草

送歐楨伯工部

玩世藉微祿懷歸驗夙心一樽霜露冷三徑草堂深月
是初弦夜秋當欲暮陰蛩聲寒咽雨流入短長吟

如愚 一首

如愚字蘊璞江夏人少為諸生負俗為僧居衡

山尋居金陵碧峰寺有飲河橐石頭菴集

春日龍潭菴對雨

苔蘚空門外
烟蘿夾徑陰
春流一澗急
寒雨數峰深
鳥倦還山翼
雲遲過客心
望中燈火起
人語出遙岑

弘灝一首

弘灝字空波
鄞人傳慧弟子

屠田叔云空波詩爾雅而調適

詩話上人朗初學詩于楊伯翼侍几杖於五井山伯翼遺草得傳皆其力也朗初以詩法轉授空波及西來休遠時人以比支遁支亮支纖謂之一朗三支云

秋江晚歸

流覽山川幽意多
渾忘落日挂藤蘿
潮催客子還家櫂
風送漁舟入浦歌
深樹煙披連翠幕
遠峰雲在失青螺
臨行笑指芙蓉發
明日還期倚杖過

佛引一首

佛引字西來

唐人屠田叔云西來詩溫簡而開暢

晚晴寄空波空明休遠

前邨收薄靄
舍外雨新晴
竹鼠爭枝墜
檐烏得食鳴
峰開餘日氣
水咽過灘聲
芋熟沙田早
連朝憶友生

圓復二首

圓復字休遠鄞人

李杲堂云三支詩以休遠為第一此外又有萬說希聲福

亮覺真道東起白宏演敬中皆延慶寺僧俱一時之秀

山中

擲葉縫衣翠松花作飮香全生無長物辛歲有餘糧觀
瀑衣忘溼綠流路轉長偶然逢怪石跌坐一林霜

留別念空

問水尋山各自忙草鞋無底踏秋霜江南游遍還江北

何日能來共竹房

廣印一首

廣印字聞谷嘉善人居杭州開元寺

登毛公壇

黃屋辭仙闕玄關向北開驅雞何處去跨鶴幾時來殘
雪明丹井清霜肅古臺寒烟縹緲外一望一徘徊

廣潤二首

廣潤字等慈吳興人居雲栖寺終老虞山之拂

水菴

晚泊南岸有懷吳允兆茅孝若客燕中

孤櫂倚江濱
魚梁浦樹分
北書曾未達
南鴈最先聞
碧海生寒月
空山冷暮雲
不堪三逕遠
何以慰離羣

蕪湖道中

江明分采石
柳暗夾橫塘
驟雨菱花亂
輕風禾黍香
秋聲催鴈驚
暝色下牛羊
遠道人烟少
偏令游子傷

如清一首

如清字石浪城固人祝髮紫栢山尋居匡廬金
輪峰下有枯木吟

答客問小徒到家消息

瓢笠星霜三月周計程應到錦江頭縱教雨雪羈行李
不在嘉州在簡州

圓憲一首

圓憲字心柏秀水天寧寺僧有青蓮居集

懷黃山吳仲玉

千里黃山別幾年冥鴻不見一書傳
昨宵忽共殘燈夢
三十六峰青刺天

行志一首

行志字

闕

擇號復元湖州人有且止菴詩集

馮開

之云志公詩清真孤迥如倪元鎮畫
遠水疎林孤雲片石絕無酸餽氣

詩話志公少出紫栢之門而不相下居於南潯
與馮開之朱文寧董遐周尤仲弢輩結方外社
遐周稱其口不談貴介筆不流凡近文寧
至謂字字作金光明色譽之未免過實

吳江道中與陸叔度並載晚至鷺脰湖別

斜日松陵道扁舟共汝還不期初握手旋復動離顏水
積猶餘岸雲多莫辨山宵來分寢處宛在淑沙間

如觀一首

如觀字蘊虛海鹽人居雲岫寺有夢華幻住禪
餘等集

春日胡孝轅過崇福菴

肩輿人病足村路邈何長獨步入深院老梅生暗香霞
飛山欲暝風急蝶猶狂相送虎谿外悠然忘夕陽

如曉二首

如曉字萍踪蕭山人栖隱天台石梁下晚居湖
上往來嘉禾有萍踪道人巖艇草

天啟甲子朱廣原居士為余構巖艇于湖上九月
落成以詩招之

心期慧遠山中社興發張融岸上船最好鯉魚風信後
東籬無雨菊花妍

春暮

雨過郊原遍落紅
柳絲無力繫東風
春陰何處栖雙燕
寂寞梨花小院中

本成一首

本成字在久蘇州慧慶寺僧有嬾雲詩藁

早行

木葉墮寒溪軒窗月已西
客心驚吠犬茅店乍鳴雞
漸覺人烟動相看馬力齊
霜華前路滑不住亂鴉啼

實訥五首

實訖字可南吳洞庭山人

傷朱雲從

別君三日前書來期我顧別君三日後書來是君訃
殷易簣語一一見心素世事無了期頽陽易遲暮啼鳥
竟夜啼啞啞感行路梅花手自栽門前落無數

蝦蟆嶺

君不見蝦蟆嶺崔嵬橫截日無影特立太湖烟水中飛
鳥何曾至絕頂崩崖挂倒樹日久生莓苔飛瀑灑石壁

磴道鳴殷雷百步幾蟠曲去矣如復回
蝦蟆嶺何年開
日見行人天上來

送燕

晚稻花香處西風送爾歸路長誰是主
社遠漸無依故
壘殘烟斷虛檐落葉稀春來芳草遍
莫忘舊柴扉

懷葛震父

虎峰言別後嬾與慢相兼已過探梅約
翻因病酒淹孤
烟生石突飢雀下茅檐昨夜林中雪
看山一卷簾

曉行

東林初日上羣壑開霽色樵夫先入山
霜草見行迹

闕
明一首

闕
明字若昧廬山開先寺僧有空響集

堯山余氏溪上納涼

夏館苦煩熱策杖出東扉於焉臨曲澗
趺坐憺忘歸嘉木散清陰芳華揚素輝
先秋蟋蟀吟薄暮鵲鵲飛情忘境自適
心寂理無違願言與同好丘壑長相依

明賢一首

明賢字履中常州人住鶴林寺有上方集

送僧歸梁溪

峰烟漠漠水雲低欲挂輕颿日已西
江月照人人不住隨風一夜到梁溪

圓信一首

圓信字雪庭更字雪嶠寧波人初住武康雙髻
峰後居徑山有語風橐

詩話雪公造詣淵微與天童悟禪師同為禹門
法嗣天童以巾拂付弟子一十二人再傳登獅
座者多至六百七十八人居士不與焉雪公終
身不付一弟子手攜藤杖甚奇古或見之以為
難得雪公笑曰小大魔王動以拄杖拂子付人
十年之後此物不中打狗謂悟公暨通容也將
示寂坐高齋俛見擔糞者過其下呼至授以拂
子曰拏去趕蒼蠅可謂獨立不懼者已其居徑
山書亭柱云孤雲游此中萬山拜其下臨終偈
云三間茅屋傍溪住兩扇竹牕關月眠均瀟灑
有致早秋對雨
之作尤覺出塵

早秋過朱子葵太守鶴洲草堂對雨分韻得飛字
方花礎潤晚涼歸隔浦蓮舟望漸稀林下自聞秋葉雨

燈前亦有草蟲飛巡檐半濕黃藤杖倚檻重添白苧衣
明發雪溪新水下前邨應沒舊魚磯

法藏二首

法藏字於密無錫人居常熟烏目峰有山居集

山居二首

覓得三峰好卜棲月涼松影到階齊山空萬籟由來寂
卧聽隔林啼竹雞

花落軍持入澗香寥寥淨域絕思量不知下界黃昏近

猶向西牕戀夕陽

海明一首

海明號破山四川人主嘉興東塔寺後入蜀有

破山語錄

詩話張獻忠殺人之多較黃巢百倍自甲申正月犯蜀陷重慶悉斷民右手既破成都僭號大西改元大順授其義兒孫可望為偽平東將軍監十九營李定國為偽安西將軍監十六營劉文秀為偽撫南將軍監十五營父能奇為偽定北將軍監二十營次年五月可望報一路殺男子五千九百八十八萬女子九千五百萬定國報一路殺男子七千九百餘萬女子八千八百

餘萬文秀報一路殺男子九千九百六十餘萬
女子八千八百餘萬能奇報一路殺男子七千
六百餘萬女子九千四百餘萬此外各營分勦
川南川北所殺之數及獻忠偽御營殺人數目
自有簿記之不與焉於是四川之民靡有孑遺
迨屯營于西克鳳皇山至自殺其卒日一二萬
人初殺蜀卒蜀盡則楚楚盡乃殺共起之秦人
後令量之以度過不及者皆死駐西克時尚存
兵一百三十萬逾兩月則剽割者過半矣相
傳破山和尚嘗勸賊帥李止殺賊帥以羊豕進
曰和尚食此吾當封刃破山遂食之此破山之
徒杖雪通醉載之語錄者綏寇紀略謂勸獻忠
誤也子友高念
祖對子述之

別石車禪師

欲別難為別
西林落月銜
且飛千里雪
聊挂一風帆
草引石梁屐
花飛金粟巖
浮雲本無著
何處尺書緘

通發一首

通發字師遠
內江人有山居草

再過永慶寺

山涌孤城外
舟行一水前
落花柔櫓撥
斜日斷橋連
丈室依林住
雙扉倚竹偏
再來情不厭
知是主人賢

大瓊三首

大瓊字石公雲棲寺僧有石公詩選

初出江口

孤嶼天際浮連檣霧中出秋容肅驚飈潮勢盪落日凭
欄舒遠眸推牕散餘帙未能冥至理且冀綜道術吾生
定有涯誰能困蓬蓽

別馥菴

偶裂塵網出因為汗漫游愛茲山水縣與子成淹留朝
看白雲起暮聽江水流有時還策杖臨壑復登丘茅屋

多真意動息無所求心期既歷落顧此忘百憂好風西
南來羽翰生素秋臨歧一揮手意氣凌滄洲君還坐巖
壑幸無生怨尤

詠史

興慶宮西花萼樓五王簫鼓晝同游曲江宰相千秋鑑
纔得開元二十秋

性琮一首

性琮字白法嘉興楞嚴寺僧有剩草

夜坐

新涼微月上，雜坐小庭前。
莫更燒明燭，飛蛾絕可憐。

讀徹七首

讀徹字蒼雪，呈貢人居蘇州楞伽之中峰。有南

來堂橐

將游黃山留別友人

孤舟明日發，再宿皎公房。
莫惜通宵坐，懸知此別長。
草花黏露重，山色入春黃。
遙指丹臺月，心期一片霜。

再至崇川

地盡應臨海天寒欲授衣月隨秋水上人共夜潮歸一
犬無聊吠羣鷗自息機橋頭燈火裏猶記舊僧扉

自吳門之雲間

春雨夜淹淹春波幾尺添背花搖短櫓礙柳揭高簾三
兩家邨落一行書酒帘華亭看不遠的的九螺尖

葑門化城菴留別社中諸友

相送了無意臨岐忽黯然回看吳苑樹獨上秣陵船春

老還山路江昏欲暮天白鷗休避我拍拍碧波圓

送朗癯入匡山

獨向匡廬去安禪第幾重九江黃葉寺五老白雲峰落
日啼蒼兕飛泉挂玉龍憑將歲寒意先報虎溪松

入林

入林不知深但覺衣裳冷新綠滿空山低頭不見影

雜詩

天氣秋晚晴坐看西山色前溪有故人草深行不得

契靈二首

契靈字仲光號佛石蕭山人居杭州理安寺有

山居詩

山居二首

屈曲山路長曾不見車馬鳥啼落日黃處處逢樵者
懸崖老樹枯樵斧不敢割亂挂猢猻藤不知幾千尺

明澗一首

明澗字道問成都人

落葉

臨高觀遠浦愛此水氣清一葉欲辭樹百葉相隨鳴不能同枯枝遂此幽禽情

明河一首

明河字汰如南直隸通州人

絕句

二月山容醒林端別有香心知春尚早蜂蝶一齊忙

一作

忙已先

弘句一首

弘句字致言歛人雪嶠弟子

東溪過朱子容

門外秋瓜蔓垂垂過板橋東溪一夜水竈下有魚跳

通蘊一首

通蘊字靈章阜亭山僧有巢枸集

寄周青士

作去聲詩賣米周青士白業還能精進無忽憶歲朝風雪

裏扁舟訪我到西湖

道源 四首

道源號石林太倉州人居吳北禪寺有寄巢詩

集

詩話石林好讀儒書嘗類纂子史百家為小碎
集又以餘力注李義山詩三卷其言曰詩人論
少陵忠君愛國一飯不忘而目義山為浪子以
具綺靡華艷極玉臺金樓之體而已第少陵之
志直其詞危義山當南北水火中外箝結不得
不紆曲其指誕謾具辭此風人小雅之遺推原
其志義可以鼓吹少陵惜其書未刊行曾吳江
朱長孺箋義山詩多取其說間駁其非於是一

時詩家謂長孺陰掠其美且痛抑之
長孺固長者未必有心效齊丘子也

早梅

萬樹寒無色南枝獨有花香聞流水處影落野人家雪
後留雲淡離邊待月斜牀頭看舊曆知欲換年華

寄黃新都子羽

入蜀七千里一官行路難鳴琴知訟寡薄賦喜民安閣
道雲中見峨眉雪外看遠書貽藥物不減握中蘭

題徐巢友玄洲

聞之上古人都不記寒暑來者問以年笑指花開處

湖邨晚興和陳確菴韻

芙蓉水面落殘紅尚有餘香逐岸風一片秋光描不得
翠禽時掠夕陽中

智觀二首

智觀字止先一字蔚然江都人有中峰草

山居二首

於世了無味戀茲湖上山萋萋芳草合寂寂小庭閒竹

覓分泉遠松林待鶴還閉門何不可誰耐日躋攀
新開百弓地已得曬袈裟朝暮狙公芋冬春鹿女花薄
寒風落木過雨海蒸霞堅卧從頭白何勞問歲華

廣化一首

廣化字無期嘉興人住持海鹽天寧寺有唾餘
集

晚次毘陵驛

城邊暮雨掩殘罽野店黃昏颭客燈風俗他鄉曾不辨

隔谿人指是毘陵

明懷一首

明懷字墨浪山陰雲門寺僧有寢言

雲門和王陽明先生壁間韻

偶入空巖遠扶筇趁鹿游為憐千嶂寂擬結一茅休漱
玉飛泉潤生雲抱石幽行吟溪上月清影逗林丘

明孟二首

明孟字三宜雲門顯聖寺僧

北塘散步

北塘行數里漸遠入雲根
酒旆綠楊渡漁罾黃鳥邨
泉流長繞樹山色盡當門
荒冢歸牛馬沙隄日又昏

病中送魏冰叔還寧都

石罇秋棠一節紅
主人新病客堂空
送君歸度翠微嶺
早有梅花小雪中

智闇一首

智闇字六雪江西瀛山寺僧有炊香堂文集

石澗

雪瀑交飛谷口喧
石橋虎過漸黃昏
瘦筇問我誰為伴
笑指攀崖下樹猿

無丈五首

無文字貞白崑山鵲林僧有鵲林草

呼德下云貞白死時

年三十三遺詩僅六十餘首語新體潔雅
近中唐摘其佳句即皎然齊已何多遜焉

擬古

時俗好蔽美佩艾捐芳蘭
天地一以閉賢者詎苟完
白

壁獻楚人投棄身為殘伯牙失鍾子山水不復彈寒寥
千載間所歎知音難

聞雞

一聲天漸曉野外獨相親乍落城頭月旋飛馬足塵出
關仍有客起舞更無人舜跖分何易聞聲太息頻

將之潤州簡崑山諸子

囊攜贈什滿朋箋豈用臨歧更黯然瓦盞未謀前路食
草屨先乞故人錢江山半壁全輸我風雪何心亦上船

他日若吟懷友句定驚深壑老龍眠

送嬾雲師歸滇

一身初越死生關萬里惟憑白足還怕說雨昏江上寺
愁逢花發夢中山心摧故國浮雲外淚濕春風岐路間
瓢笠天涯誰念遠無窮哀怨不能刪

過胡白叔舊居

衡宇依然沒草萊已無吟叟杖蒼苔夕陽一片疎籬下
幾點寒花獨自開

照影三首

照影字指月吳江江楓菴僧有鏡齋詩草

安慶

南北稱方鎮江淮接鼓鼙
濟奔皖口急山壓土城低
遠戍生煙少飛帆入暮齊
欲尋公瑾墓日落大龍西

聞角

哀角聲何切寥寥此夜長
可憐南浦月更下北庭霜
漸起棲鴉翼應迴斷鴈行
愁人難及曉一望海雲荒

蘭舟渡

蘭舟古渡已茫然，雲外山橫百瀆煙。
留得龍堂鐘磬響，寺門長泊洞庭船。


道盛一首

道盛字覺浪，閩人，住金陵天界寺。

詩話：浪公早登猊座，聲動楚越之交，白蓮之社。
不少宗雷青豆之房，恒多龍象。詩如清明微雨，
後花鳥亂飛時，苦竹長遮徑，高松自護闌，足稱天籟清機也。

浴龍池

枕流漱石亦何心
苻帶蘋花何處尋
夜靜月明風在樹
坐聞泓下有龍吟



明詩綜卷九十一

欽定四庫全書

集部

明詩綜卷九十七

詳校官中書

臣

涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊恪

欽定四庫全書

明詩綜卷九十二

翰林院檢討朱彝尊編

靜志居詩話女冠盛于唐楊太真以開元二十三年既冊為壽王妃尋度為女道士敕曰壽王瑁妃楊氏素以端懿作嬪藩國雖居榮貴每事精修屬太后忌辰永懷追福以茲求度雅志難違用敦弘道之風特遂由衷之請唐會要公主度為女道士者一十四人金仙玉真萬安楚國華陽漢陽潯陽平恩邵陽永嘉永安義寧義昌安康下而宮人入道朝士輒為賦詩花間尊前詞客無不倚聲填女冠子小令蓋風尚則爾然自李冶魚玄機外女冠之能詩者寡由宋以降

益復家元有宮人玉金蓮晚為道士提點昭
應宮卒贈淵靜元素真人表摘為之草制此僅
事也至於象教東流比丘比丘尼當一時俱集
矣而尼至晉建興中始有之莊嚴寺僧寶唱撰
比丘尼傳以洛陽竹林寺尼淨檢稱首焉宋有
妙總為蘇魏公頌孫又温州淨居妙道禪師係
黃公裳女並有法語見傳燈錄明正統中有呂
姑諫阻裕陵北征復辟後為建順天保明寺都
人目為皇姑寺者是已顧終明之世禪學頗盛
而尼之著作無聞迨天啓崇禎之季始有付巾
拂立禪林者因
合女冠為一卷

羅素月一首

素月惠州羅浮山女道士

梅花邨

麻姑仙窟鮑姑山鳳子翻飛遠嶠還玉女峰頭人冷笑
杜蘭香去嫁人間

吳靜婉一首

靜婉金壇人蘇州木瀆女道士

別思

西菴雨未收東菴風又作留住綠蓑衣莫與篙師著

行徹一首

行徹字繼總衡州人劉善長之女嫁陳氏子而寡中歲出家為僧通微弟子住嘉興福國禪院

有語錄

詩話繼總偈語多近詩者如山居云野猿探果熟巢鳥入林深送人云晚食蓴絲滑秋衣薜荔輕落葉云秋聲千葉墜遠影一巢孤均有郊島風骨

秋日懷母

不見慈闈秋信來
籬邊黃菊帶霜開
為憐消息無人寄
一日峰頭望幾回

行剛一首

行剛號祇園嘉興人處士胡日華女嫁諸生常
公振未暮而寡中歲出家為僧通乘弟子住嘉
興梅會里伏獅院有語錄

詩話石車乘禪師以如意付祇園此崇禎丁丑
年事先伯祖母趙淑人嘗師事祇園疑義必質
故余少日曾見之威儀醇樸母論空門行業即以
節婦論亦宜存其片言以當鳳樓新識也淑人
崇禎間兩朝中宮周后語宮人云朝中命婦率
遽篠戚施薄福之相維刑部朱侍郎妻莊嚴婉
麗稱此
象服爾

孟夏闕中詠

百結鶉衣倒挂肩
飢來喫飯倦時眠
蒲團穩坐渾忘世
一任塵中歲月遷

神一一首

神一初名淑吉字美南姓夏氏考功允彝女也
歸侯洵二十而寡遂削髮為尼更今名改字荆
隱有龍隱遺橐

悼亡

蕭蕭鑒玄夜幽室生微涼眷言念君子沉痛迫中腸音
微日以杳翰墨猶芬芳靈帷空蕭條齋奠真荒唐舉聲
百憂集泣涕不成章

詩話詩不期工一
真摯足以傳矣

明詩綜卷九十二

欽定四庫全書

明詩綜卷九十三

翰林院檢討朱彝尊編

靜志居詩話土司之目自古無之禹貢三百里蠻書攷獒周官職方氏記明堂位稱八蠻爾雅稱六蠻其種曰黎曰玃曰狢曰獠曰獠曰獠曰獠有大姓為之雄長明制仿元舊典分設官吏立宣慰招討安撫長官司四司初隸驗封後以其半隸武選嘉靖中申明舊典隸驗封者布政司領之隸武選者都指揮使領之文武相維羈縻有術雖間有不靖旋即削平歲澤霑濡久而漸知嚮學若黔之宋氏昆友滇之木氏祖孫各著詩文妮于風雅昔韋宗見禿髮傳檀歎曰奇才英

器不必華夏明智敏識不必讀書九州之外五經之表復自有人錄土司之詩明之聲教遠矣

宋 昂

昂字從頻號省齋襲貴州宣慰使與弟昱有聯

芳類豪

謝少安云宋氏所領部下多漢人易馴服凡里甲在官及儒學弟子員皆其民

也

毛大可云貴州蠻種不一有宋家蔡家相傳春秋時楚子俘宋蔡二國人而放之南疆遂

為蠻

詩話洪邊宋家其先鎮州人遠祖景陽開寶間官節度使平定西蠻詔就大萬落樂開總管府俾鎮其地歷十有四世曰阿蠻仕元官至昭毅大將軍靖江路總管佩三珠金虎符階榮祿大

夫平章政事柱國順元侯贈貴國公諡忠宣又
三世曰欽洪武初內附授懷遠將軍世襲宣慰
使按貴州苗民五十一部安氏領四十九部長
曰頭目宋氏領十二部長曰馬頭昂昱兄弟俱
能文昂詩有云采藥難尋蓬島路垂綸却憶鑑
湖船疎砧殘月孤村夕衰草斜陽兩岸秋風靜
洞庭高浪遠月明揚子暮潮寒昱詩有云野戍
清秋聞鼓角烟村日出露松杉數聲啼鳥憑歌
枕滿地斜陽深閉門卧聽笙歌來別岸起看鷗
鳥浴前汀壩麓迭奏風韻翩翩試掩姓氏誦之
以雅以南莫辨其
出于昧任侏離也

送趙遜敏東歸

琴鶴先生樂自然故山歸去白雲邊門前柳憶陶元亮

洞口人迎葛稚川行色蒼茫林影外離情蕭索酒杯前
欲知別後相思意疎柳寒梅鎖暮烟

宋 昱 一首

昱字如晦號宜菴昂之弟

送汪公子還嘉禾

城上棲烏下女牆城邊行客醉壺觴一尊風雨秋蕭颯
千里關河路渺茫鄉夢已隨雲去遠離情空與日添長
憑誰為報南湖遠早晚還來理釣航

木公恕五首

公恕字恕卿，笄人先本麥氏，洪武中歸附，賜姓

世襲麗江知府，有雪山始音萬松吟卷

詩話：恕卿，韶年，讓爵隱於玉龍山，南亭曰翠雪，搗曰丹霞堂。曰：一鏡種桃，藝竹環以山松，又起迎仙之樓，日以吟詠為事。中年將兵，却敵功在邊隅，永陵有御書之褒。於時貴竹二宋未之或先，張禹山稱其朗潤清越。李中溪謂其得樂府音節，揚升菴許其體句俱新，寫景入繪。諸公之賞音若此。

江邨

江上層雲合邛邛結暮陰漁燈半明滅風雨葦花深

病起

臨曉新梳髮呼兒卷幔紗平生行樂慣病起即看花

飲春會

官家春會與民同土釀鵝竿節節通一匝蘆笙吹未斷
蹋歌起舞月明中

春游即事

綫絨緩拽紅氍毹叱撥頻嘶綠巷深踏柳穿花還未遍

夕陽又抹樹頭金

種柳

雙楊初種幾經春始見長條已拂塵
萬里綠陰堪作幃
一枝不許贈行人

木青一首

青號松鶴又號長春公恕曾孫卒贈中憲大夫
有玉水清音

詩話松鶴詩不及曾祖而勝其子增增
篇什雖倍然非卧子所云中土詩也

移石草亭

萬松深窈處獨構此茅廬
斲地移新竹通泉溜小渠
琴書常作侶木石與為居
笑殺求名者磻溪一老漁

明詩綜卷九十三

欽定四庫全書

明詩綜卷九十四

翰林院檢討朱彝尊編

高麗

靜志居詩話高麗文教遠勝他邦自元以前詩
曾經大司成難林崔瀧彦明父選目錄曰東人
之文凡二十五卷度必有可觀惜無從訪求今
之存者僅會稽吳明濟子魚朝鮮詩選而已
又有人為王氏諸臣白冤可謂發潛德之幽光
矣予更證以高麗史東國通鑑東國史略殊域
周咨錄皇華集輜軒錄訂其異
同補其疎漏論次稍加詳焉

契遜一首

遜回鶻人初名百遼世居契輦河因以為氏家
世仕元順帝時中進士歷翰林應奉文字宣政
院斷事官選為端本堂正字恭愍王七年避兵
東來賜第封高昌伯改封富原侯有近思齋逸
稿

山雨

一夜山中雨風吹屋上茅不知溪水長祇覺釣船高

鄭夢周 三首

夢周字達可高麗迎日縣人初名夢蘭又名夢
龍既長改今名恭愍王九年應舉擢第一人累
官政堂文學進三司左使改進賢館大提學知
經筵春秋館事兼成均大司成領書雲觀事初
封永原君加封益陽郡忠義君為李成桂所殺
梟其首于市籍其家後贈大匡輔國崇祿大夫
領議政府事修文殿大提學兼藝文春秋館事

益陽府院君謚文忠有圃隱集

詩話靖難君臣改修明太祖實錄因方孝孺而
其父克勤循吏也乃沒其實黃觀景清修書傳
會選而削其名且誣方先生叩頭乞哀觀於鄭
麟趾高麗史夢周圖李成桂不克為芳遠所殺
芳遠猶知贈官易名麟趾等亦直書其事是墓
竊之芳遠賢于長陵而下國之史官勝于楊士
奇輩多矣
可歎也夫

感遇

人心如雲雨翻覆在須臾素絲變其色安能復厥初
啞羣飛鳥集我中田盧雌雄竟莫辨涕泣空欷歔

使日本書懷

水國春先動天涯客未行草連千里色

一作綠

月共故鄉

明游說黃金盡思歸白髮生男兒四方志不獨為功名

偶題

赤葉明村徑清泉漱竹根地偏車馬少山氣自黃昏

李 穡 一首

穡字穎叔中征東省鄉試第一明年赴元廷試
擢二甲進士授應奉翰林文字累官政堂文學

封韓山府院君進位門下侍中與鄭夢周同謀
去李成桂放於韓州再放衿州徙驪興尋封韓
山伯卒謚文靖有牧隱集

早行

凌晨間前路曉色未全分帶月馬頭夢隔林人語聞樹
平連野霧風細繞溪雲異國堪愁絕南天無鴈羣

李崇仁 一首

崇仁字子安京山府人恭愍王時登第官至簽

書密直司事同知春秋館事李成桂簒立以鄭
夢周黨削職遠流有陶隱集

挽金太常

禮儀今太叔史學昔公羊
四十人間世千秋地下郎
空庭餘敗草老樹逼一作斜陽
俯仰成陳迹經過只自傷

李詹一首

詹洪州人恭愍王時及第授藝文簡閱三轉為
正言歷知申事

雜咏

舍後桑枝嫩畦西薤葉稠陂塘春水滿
穉子解撐舟

權近一首

近初名晉字可遠一字思叔號陽村高麗秀才

有應制集

詩話陽村至京師高皇帝優禮待之賜衣賜食
爰命賦詩陽村先之以本國發興之由道塗經
過之所次之以本國離合之勢山河之勝與夫
鄰境之情形兼述東人感化之意既成精華炳
蔚音響鏗鏘帝覽之稱歎因命與劉公三吾許
公觀景公清戴公德彛張公信輩偕游南北市

來賓重譯鶴鳴醉仙諸樓帝又賜以御製三詩
此洪武丙子歲事建文四年春朝鮮恭定王李
芳遠令知申事朴錫下議政府鑄板以行於是
嘉靖大夫藝文館提學國人李詹暨奉使翰林
史官兵部主事金陵端木孝思均為作序而淮
南陸顥番陽祝孟獻題詩其後焉陽村賜游酒
樓實錄未之載予所見應制
集則天順元年朝鮮本也

題鶴鳴樓

鶴鳴樓上久徘徊環珮珊珊緩步來已喜清歌和寶瑟
况看纖手奉金杯南臨帝甸山河壯北對天門日月開
得被內臣宣聖澤六街三日醉扶回

權 遇 一首

遇爵里未詳

竹長寺

衙罷乘閒出郭西殘僧古寺路高低祭星壇畔春風早
紅杏半開山鳥啼

金九容 一首

九容初名齊閔字敬之安東人中進士拜三司
左尹與李崇仁權近等上書都堂阻迎北元使

竈竹州召為左司議大夫終成均大司成尋流
大理衛有惕若齋集

詩話敬之年十六中進士國王命賦牡丹詩敬
之居首既因諫迎元使被流扁所居曰六友堂
以詩酒自娛亦
瀟灑之士也

江水

江水東流不復回雲帆萬里向西開
荻蒲兩岸微風起楊柳長堤細雨來
別夢遠迷箕子國旅愁獨上楚王臺
行行見說巫山近一聽猿聲轉覺哀

趙云伋一首

云伋高麗豐壤縣人恭愍王六年登第調安東
書記累轉閤門舍人以刑部員外郎從王南幸
遷國子直講歷全羅西海楊廣三道按廉使辛
禍三年起授左諫議大夫辛昌立召拜僉書密
直司事升同知恭讓王二年出為雞林府尹李
芳遠篡立授江陵大都護府使以病辭又拜簡
校政堂文學不授祿

詩話云：佺以典法郎退居尚州，露陰山下自號石磧。棲霞翁出入騎牛超然，有世外之想。及轉判典校，復退居廣州古垣江村，營板橋沙平兩院，自稱院主。敝衣草履，與役徒同勞苦。李氏集立爵祿，不受。臨終，自誌其墓云：佺本豐壤人，高麗太祖臣。平章事趙孟三十代孫恭愍代興安君李仁復門下登科，歷仕中外，佩印五州，觀風四道，亦無聲績，亦無過譽。年七十三病終。廣州古垣城無後，以日月為珠璣，以清風明月為真，而葬于古楊州我崖山南。銘曰：孔子杏壇上，釋迦雙樹下。古今聖賢人，豈有獨存者？可謂欽奇跌宕之士。考云：佺仕恭愍朝，非李氏得國之後，以鄭氏高麗史為正。

即事

荆門日午喚人開步出林亭石滿苔昨夜山中風雨惡
一溪流水泛花來

朝鮮

詩話高麗朝鮮一也然王氏建國本名高麗迨
李氏稱藩始更朝鮮未可以王氏死事之臣入
之朝鮮也今以李芳遠襲位之後諸陪
臣別為朝鮮庶幾無戾通鑑綱目書法

鄭道傳一首

道傳官右軍總制使芳遠立召為奉化郡忠義

君

重九

故園歸路渺無窮
水遶山圍第幾重
望欲遠時愁更遠
登高莫上最高峰

曹庶一首

庶嘗使明流金齒國道經五靈廟題詩

五靈廟

村南村北雨淒淒
古廟靈風楊柳低
十里江山看枕上
竹林深處午雞啼

鄭希良 一首

希良爵里未詳

偶題

十年一劒遠平戎
勲業蕭條歎轉蓬
瘴氣曉來雲似墨
山容霽後雪為峰
地連龍穴天多雨
門對鯨波晝亦風
幾被故人吟桂樹
客窓落莫傲歸鴻

朴原亭 三首

原亭官戶曹判書調刑曹判書

詩話天順元年使朝鮮者翰林修撰吳陳鑑緝
熙太常博士會稽高閏居平三年奉使則刑科
給事中餘姚陳嘉猷世用四年奉使則禮科給
事中海鹽張寧靖之原亨凡三充館伴靖之贈
詩云朝鮮賢臣朴判書老成文
物非凡儒蓋其國中翹楚也

登漢江樓次張黃門韻

二首

遠岫橫如黛芳郊綠漸平
歸鴉翻夕照啼鳥弄春晴
暫得新知樂還教別恨生
關山逾萬里何處望燕京

春光方浩蕩嵐翠轉霏微
雪浪搖歌扇汀蘭襲舞衣
素鱗時潑潑輕燕已飛飛
景物看如此從教緩緩歸

渡大同江次韻

遠傳丹詔促行裝暫駐星槎潁水陽江浦雪消春意動
郵亭日暖客懷長一杯且可酬佳節萬里無勞憶故鄉
野濶天低山似畫不禁詩思入蒼茫

申叔舟 二首

叔舟字汎翁自右弼善歷禮曹判書積官至議
政府領議政以功封高靈君有汎翁集

詩話考叔舟於景泰二年八月國人鄭麟趾進
高麗史表修史官三十二人叔舟與焉書銜曰

中訓大夫集賢殿直提學知制教世子右輔德
兼春秋館記注官知承文院事臣申叔舟天順
元年官議政府右贊成四年進左議政成化七
年十二月奉國令撰海東諸國紀書成作序書
銜曰輸忠協策靖難同德佐翼保社炳幾定難
翊戴純誠明亮經濟弘化佐理功臣大匡輔國
崇祿大夫議政府領議政兼領經筵藝文館春
秋館弘文館觀象監事禮曹判書高靈府院君
臣申叔舟紀書日本代序及八道六十六州頗
詳所著詩集二十卷孫從茂編寧都董尚書越
使其國
為作序

陽德驛

北塞歸遠塗千里度陵谷日暮投陽德館宇半茅屋輕

風吹枯枝短垣依斷麓雨歇低行雲山深聽鳴鹿坐久
正蕭然清溪走寒玉遠客自無寐呼童剪殘燭

次韻登漢江樓

綺席登樓迴春江碧玉流早梅香澗曲芳草滿汀洲賓
主歡情洽江山喜氣浮良辰須酩酊莫惜更遲留

權 擘 三首

擘由吏曹判書累遷右議政

詩話陳緝熙使朝鮮國人賦詩繼和者自朴原
亨申叔舟外有若仁順府尹寶文閣提學金守

溫領議政鄭麟趾禮曹參判盧叔仝禮曹判書
洪允成兼成均司成金鈞金未左承旨曹錫門
而權擘為之作序書銜曰吏曹判書集賢殿大
提學知春秋館事後二年進議政府右贊成明
年進右議政其序略云詩者人心之感物而形
於言也心之所感既不能無邪正故言之所形
亦不能無是非惟聖人在上則人皆親被其化
以成其德有以得夫性情之正故其所感而發
於言者粹然無不出於
正矣其持論頗中繩尺

登漢江樓 二首

南樓初縱目檻外俯長流
雪盡落梅塢春深芳草洲
湖光晴濫濫山氣暖浮浮
使節陪登眺斜陽更挽留

城南一樽酒相對暮山青
小艇橫前渡孤帆落遠汀
江雲連復斷主客醉還醒
落筆龍蛇動高懷入窈冥

楊花渡次陳給事韻

山亭置酒近江湄興至頻傾白玉卮
萬里歸來多客恨一時登眺得神怡
高標已覺冰霜操新調還聞白雪詞
北去他年如記憶也應飛夢到遐陲

尹子雲

三首

子雲官都承旨

登漢江樓次韻

三首

高軒時暫駐勝地許相招詩律吟邊改愁懷醉後銷汀
花經雨動岸柳受風搖忽起中流興春心付短橈

何處窮遐矚丹梯近百層陽坡先有草陰壑已無冰美
景時相引風懷晚尚仍欲成賓主好觴詠正堪憑

風光觸處好春氣望中微山淨濃如畫江深綠染衣夢
隨蝴蝶亂心逐野雲飛人世難開口惟須倒載歸

李克堪 一首

克堪官左承旨

登漢江樓次韻

遲日晴方好和風暖更微
山陰追禊事沂上換春衣
劇飲金卮滿清譚玉屑飛
牆頭輕燕舞有意惱人歸

徐居正一首

居正字剛中議政府左參贊有北征稿

詩話成化丙申祁主事順使朝鮮居正充遠迎
使既為館伴因時與倡和為序其北征稿北征
稿者天順庚辰居正奉王命入覲而作也順稱
其博古通經長篇短章淵淵乎有本浩浩乎不

窮與中國之能詩
者殊不相遠云

即事

小沼如盤水淺清
菰蒲新發荻芽生
連筒引却前溪水
養得芭蕉聽雨聲

中從渡一首

從渡叔舟孫官成均直講

傷春

茶甌飲罷睡初輕
隔屋聞吹紫玉笙
燕子不來鶯又去

滿庭紅雨落無聲

許琮 六首

琮字宗卿安興人由進士為吏曹判書積官至
參政府議政有尚友堂詩集

詩話孝宗即位之初以右春坊右庶子兼翰林
院侍講寧都董公越工科右給事中上元王公
敞頒詔于朝鮮宗卿時為館伴繼和之作綽有
唐人風格句如春歸飛鳥外天闊落帆中細雨
全沉樹孤城半帶烟東風瓜蔓水斜日竹枝歌
風急搏羊角波翻起鴈羣官橋晴曉網野渡晚
維舟俱清婉可誦董公為作序稱其音律諧暢
蕭然出塵非虛譽也董公後仕至南京工部尚

書贈太子少保謚文僖王公亦仕至太子少保
兵部尚書贈太子太保宗卿祖嗜字原德官奉
嘗有梅軒集曾祖錦字在中官
判書有野堂集見龔吳兩公序

登浮碧樓次韻

渚草平如翦江雲濕不飛餘霞飄綺席新浪濺苔磯古
寺蘿垂壁漁家水浸扉眼前多少景惆悵客將歸

安興道中次王黃門韻

韶光如酒著人迷漫把霜毫取次題山北山南春雨歇
隔林紅日鶉鳩啼

登鳳山樓次韻

獨倚雕闌帽影斜
客中衰鬢已非鴉
不禁杜宇聲聲苦
啼盡東風第一花

松林晚照次韻

一村桑柘夕陽微
芳草叢生柳絮飛
已過蘭亭修楔後
風寒猶未著春衣

所串館道中即事次韻

二首

數株官柳野橋傍
飛絮紛紛撲馬香
江雨欲來龍氣黑

水風吹作十分涼

家在江南水竹村
鳥啼花落掩柴門
年年奔走東西路
坐席何由得暫溫

成
覲一首

覲西京觀察使

詩話朝鮮兵曹判書魚世謙弘治元年序皇華
集錄覲詩四首王尚書稱為成中樞又稱成同
知又為作風月樓記則云西京觀察使惜
成化一朝奉使之詩無存未能詳考矣

擬古

今日良宴會嘉賓滿高堂綺肴溢雕俎美酒盈金觴左
右燕趙姬眉目婉清揚朱絃映皓腕列坐彈宮商流年
雙轉轂倏忽鬢已霜相逢且為樂何用苦慨慷金張竟
何許累累歸北邙

成

侃一首

侃爵里未詳

囉噴曲

為報郎君道今年歸未遲江頭春草綠是妾斷腸時

盧公弼 二首

公弼安州人官戶曹判書

詩話弘治五年兵部郎中南昌艾璞德潤使朝鮮公弼充遠接使亦有詩贈答知成均館事洪貴達序之

開城太平館次艾兵部韻

斜陽策馬過孤城想像當年玉作京國破山河渾似舊
時平民物不知兵春深古館生禾黍水涸荒池插稻稭
往事悠悠何處問鶴歸華表月空明

鳳山樓次董內翰韻

畫樓登眺帽簷斜
苔壁詩成字點鴉
幽興未闌天欲暮
一簾疎雨落桐花

李 符 三首

符字擇之官議政府右贊善

詩話世宗入繼大統嘉靖元年奉使朝鮮者翰林修撰歙唐臯守之兵科給事中涿州史道克弘其時館伴惟符詩最多餘若金議政詮南議政袁鄭寺正士龍李寺副希輔尹承旨希仁徐承旨厚蘇司成世讓李判書沆又不知爵秩者二人洪淑成雲皆有賸酬之作然必以符為巨

摩馬

開城館次董圭峰韻

行行繇道路日日困風沙
去壑悲流水投林羨暮鴉
窮冬催暖律宿草欲新牙
更憶吾廬好寒梅幾樹花

過臨津江

臨津催早發問渡即清江
緩擊中流節徐牽上水艚
寒魚依石竇曉日照蓬窓
有客忘機坐飛來白鳥雙

荅鹿峰給事

歸袂忽忽不可攀銷魂祇是黯然間鹿峰正在千山外
鳳節全無半日閒今日預將詩作別他宵何忍月同還
此生難復陪清賞悵望雲霄玉筍班

李希輔 二首

希輔字和宗由禮賓寺副正歷官同知中樞府
事有安分堂詩

蔥秀山次唐先生韻

客行值殘臘長程催短景天寒鬚易冰葉脫木無影揮

鞭發安城露濕衣袖冷迺遽度雲漢邂逅逢峻嶺緬懷
董學士曾此憩覓靜突兀數尺碑其文信蔚炳往事浮
雲空幾年孤此境茲山真自幸四牡又來騁留詩繼前
賢頓覺仙凡迴而我苦駑緩古訓蒙不省何幸接詞源
飛流激奔猛涯涘不能窺況敢得要領無心和陽春有
懷徒耿耿願言借餘光破我心昏暝

次唐修撰夜宿太平館醉起韻

雄辭海生波醉墨鴉翻壁無使我公歸於焉作佳客

蘇世讓 八首

世讓字彥謙初官成均館司成遷戶曹判書歷
議政府左贊成有清心堂詩

詩話彥謙自嘉靖元年即與使臣唱和至十六
年十八年凡三充館伴詩雖平衍亦稱具品

箕子操

天疾威兮不祚我商
目眇眇兮未見日光
主聖善兮我無良欲
暝我目兮羞我先王
吁嗟乎我寧為奴兮
寧忍發出狂

東方五章答陳給事

維我東方有山蒼蒼有水泱泱君子戾止維其有章

我有嘉賓我心則愉貽我以佩琚

我有嘉賓既敬且久貽我以佩玖

何以報之報之以椒蘭有德斯馨唯以永歎

何以報之報之以芡荷服之無數其樂如何

蔥秀山次唐先生韻

我並青山行山行信多景淵潭清見底杉檜翠交影况

當汨陰天風日淒以冷蕭蕭晚雨霽突兀見斯嶺巖巒
互迴合洞壑極冲靜有如畫圖開不用丹青炳曩時董
學士探勝得真境眷茲心賞諧更將文字騁至今凜清
風未覺歲月迴賞音會有人二妙復來省陽春一繼和
筆力肆豪猛小子忝後塵盛事心已領攬舊又感今中
懷益耿耿沉吟久佇立前峰欲含暝

漢江陪宴

斷徑緣崖轉高樓面水開杯盤供宴賞歌鼓殷晴雷沙

遠迷烟樹潮迴沒釣臺江山如許勝應為使星來

荅鹿峰給事

珍重龍門豈易攀屢承清誨笑談間極知後會終無地
其奈前程苦未閒佳境總為忙裏過好詩空貯橐中還
明朝悵望雲山遠杳杳仙蹤隔鷺班

良策道中次韻

春陰釀雨欲淒迷長路愁衝滑滑泥奔霧逐風歸遠岫
亂流經野赴前溪潮從小浦平時上燕掠平蕪盡處低

高卷湘簾望山氣夕陽猶在短峰西

太平館次韻

望眼山連北歸心月向西羈魂與別恨愁殺五更雞

初見杜鵑花次雲岡修撰韻

際曉紅蒸海上霞石崖沙岸任歌斜杜鵑也報春消息
先放東風一樹花

鄭士龍一首

士龍字雲卿鼎津人由內資寺正遷刑曹判書

歷漢城府判尹改戶曹判書再改吏曹判書階
資憲大夫有湖陰草堂詩集

詩話雲卿嘉靖中五充館伴道交禮接為羣公所稱唐守之贈詩云鄭子有詩才宜在鷓鴣下龔雲岡則謂其沉著冲澹不為綺麗豔冶之辭有唐人之遺意嘗築十玩堂于鼎津十玩者竹梅松菊水石并楮研筆墨而十也守之及史紹事克弘皆為之賦詩及華亭張行人承憲奉使國王刊其詩入皇華集俾雲卿序之謂古之詩人類皆有為而作未嘗為無益之辭是亦得詩人之旨者也句如不謂交歡地翻成送別亭具饒韻致

長虹

垂虹屈曲跨清波藻荇香中笑語過恰似松江三百尺
樣船聞唱采菱歌

金安老 二首

安老字頤叔歷官議政府左議政領書筵監春
秋館事兼弘文館藝文館大提學知成均館事
階崇祿大夫有明虛軒集

詩話朝鮮君臣最稱好事使者輜軒一至即命
館伴遠迎屬和詩章連篇累牘翼修撰用卿鳴
治吳給事希孟子醇於嘉靖十六年奉使國王
遣陪臣十人陪讌漢江之上汎楊花渡登龍頭

峰縱觀江山之勝十人者金議政安老蘇判書
世讓尹判書仁鏡金參贊麟孫沈判書彥光吳
判尹潔許參贊洽鄭判書士龍許參判沆朴承
旨洪麟皆國中名士此外復有金議政謹思尹
議政殷輔黃承旨憲朴承旨守良黃承旨琦鄭
參判百朋開城韓留守脩昌京畿金觀察希說
平安道李觀察龜齡中樞李同知希輔咸有詩
篇繼和極東國一時之盛皇華是集安老實序
之

望遠亭次韻

幽興牽人惱遊蹄豈惜遙殘雲橫浦口飛鷺割山腰江
穩開輕纜潮生沒斷橋異鄉歸思促心趁紫宸朝

漢江陪宴次韻

人間不信有丹丘，漢水仙舟卽十洲。
夕日蘼波紅漾漾，江烟連樹翠浮浮。
晴川有句還題壁，長笛何人更倚樓。
天上明朝遙悵望，遐陬能復記茲遊。

尹仁鏡二首

仁鏡由禮曹判書改戶曹積官至議政府領議

政

太平館次韻

紅惜花飄岸青憐柳拂橋江風吹颯颯蓬雨打蕭蕭簾
卷樓橫笛山空谷響樵雙旌拚賞去回首海天遙

登漢江樓次韻

郭外澄江江上臺登臨頓覺隔氛埃遙山雲斂雨初霽
極浦波平潮又來明月似迎星使出輕帆須趁晚風開
佳辰佳境兼佳客乘興休停到手杯

金麟孫一首

麟孫官議政府左參贊

次韻別吳副使

臨分盡醉側烏紗長路高低日易斜
好雨多情知滑道輕風惜別解飛花
留春縱欲兼留客戀闕其如又戀家
一去茫茫遼薊遠銀河何處問仙查

沈彥光一首

彥光字子求官吏曹判書

詩話子求望遠亭詩有白鴈依寒渚青驢度小
橋之句頗饒晚唐人風韻徐敬德花潭集有次
留守沈相國彥慶
韻詩當是其兄弟

太平館次韻

春鳥花邊啼暮鴉樹頭宿何事遠遊人不秉良宵燭

許洽一首

洽參政琮之孫官至議政府右參贊

詩話洽與弟沆俱有時名嘗集其先世詩號陽川世藁沆官吏曹參判兄弟皆執國政詩有漁店日斜遙笛起海門風急曉帆開之句亦覺爽氣殊倫

漢江陪宴次韻

綠水靈源自五臺新添好雨絕塵埃長洲芳草移船近

遠渚輕鷗避櫂來景物盡供今日興襟懷須向此中開
猥參勝引非吾分擬向巖前倒玉杯

國有酒巖酒
流出其下

金謹思 一首

謹思官議政府領議政

別吳副使次韻

方空歲歲感輕紗半榻香烟一穗斜
萬里往來蝴蝶夢三春開落杜鵑花
吹殘遠笛誰懷土過盡良辰不在家
日暮關山雲樹隔天津何處泊靈查

尹殷輔 一首

殷輔官至議政府領議政

游漢江次韻

江上天然百尺臺澄波無綠鏡無埃茫茫極浦舟南北
渺渺長空鳥去來汀草有情吟外碧岸花隨意望中開
叨陪高會誠踰分乘興還須倒百杯

黃琦 一首

琦由承政院右副承旨遷都承旨

開城

白駒難自繫青眼更離筵江海相忘處烟波欲暮天落
花飄醉袖芳草入吟鞭翰墨真餘事功名正妙年

金安國 一首

安國字國卿號慕齋官刑曹判書至領議政有

慕齋集

詩話使東國者前有張芳洲後有華鴻山皆中
朝之詩伯鴻山至日館伴十有一人非不每篇
踵韻然中律者寡矣十一人者議政府領議政
尹殷輔議政府右議政金克成議政府左叅贊

柳貫戶曹判書尹仁鏡史曹判書成世昌禮曹判書李龜齡工曹判書尹世豪漢城府判尹鄭士龍承政院都承旨黃琦左承旨申瑛及安國也鴻山留國中僅五日而返此見於皇華集者不能多焉

開城太平館次韻

溫韞陵廢井空青種稼田荒但記名舊跡不隨時代滅
停驂落日一傷情

申光漢一首

光漢字漢之由吏曹判書官至正憲大夫議政

府左參贊兼知成均館事弘文館藝文館大提
學同知書筵春秋館事有企齋集

詩話舊典使于東國必命儒臣給舍迨嘉靖二
十三年恭僖王薨遣使改謚及賻改命司禮監
太監郭璠副以華亭張行人承憲於是中官偕
行道塗無酬答之作禮成而返乃緘詩以寄國
人爰有吏曹判書申光漢議政府右贊成柳仁
淑成均館司藝林亨秀禮曹正郎李洪男戶曹
參判沈連源黃海道觀察使權應挺相與追
和之仍刊為皇華集一卷而鄭士龍為作序

暮景

樹密深濃翠孤烟澹作雲前村聞犬吠暗路草中分

林百齡 一首

百齡官議政府右議政

詩話張行人既使東國諭祭恭僖王憚成禮而
返明年榮靖王嵒復薨於是別選廷臣遣行人
長安王鶴往賜祭及謚陪臣以詩贈答議政府
右議政林百齡禮曹判書尹漑工曹判書任權
吏曹參判慎居寬成均館大司成李潤慶司藝
崔演承政院右副承旨洪叙疇奉常寺僉正朴
忠元開城府留守李潔京畿觀察使宋騏
壽而鄭士龍尹仁鏡申瑛李洪男亦與焉

游漢江次韻

王室千年作翰藩欣聞使節頌聲喧登樓未倦陪歡賞

汎水還容接笑言舉網漁人貪似獺操舟穉子捷於猿
夷猶領得滄洲趣還向春風望故園

李潤慶 一首

潤慶官成均館大司成

漢江次韻

漢江形勝表東藩使節登臨鼓吹喧對景每憑詩遣興
通情猶借譯傳言忘機自幸參沙島隨世何殊束檻猿
回首風光堪遠矚雨催新綠遍郊園

李 潔 一首

潔官開城府留守

詩話花潭集有贈
留守李相國潔詩

泛臨津江

臨津傳勝事駐節是仙舟
烟幕沙邊樹風迴水面鷗
笑談情不淺詩酒興難收
絕域萍蓬會無忘此日遊

徐敬德 二首

敬德朝鮮生員有花潭集

詩話花潭講學專以周邵為宗詩亦效法擊壤以金安國引薦授參奉力辭集中酬和者李相國潔朴相國祐沈相國彥慶李留守龜齡金都事洪林正字蒼沈教授義張教授綸趙上舍玉沈別提宗元朴參奉漑而朴民獻頤正金漢傑士伸趙昱景陽金惠孫彥順以及黃元孫許太輝等疑皆從游講學者也

山居

花潭一草廬蕭灑類仙居
山色開軒近泉聲到枕虛
洞幽風澹蕩境僻樹扶疎
中有逍遙子晨朝聞讀書

靈通寺次題壁韻

松溪一路入青林林下禪居晝亦陰觸石泉流三面轉
倚天山色萬重深清歡直欲朝連夜勝引應難後繼今
數局枯棋談笑裏不知雲日已西沉

辛應時一首

應時官校書館校理

詩話隆慶元年以即位頒詔朝鮮欽縣許公國
南昌魏公時亮持節以往是時恭憲王垣又薨
兩公返命共成詩一卷國中屬而和者止工曹
判書朴忠元一人議政府左贊成兼知書筵春
秋館事洪暹序之曰小邦不幸兩公之來適丁
大戚滿目愁慘無意於覽物輒題逐篇和進亦

非有喪者所當為所以倡之少而和之寡也於此足徵其為秉禮之國矣明年衡陽歐希稷以行人奉使館伴辛應時朴淳等始復有贈送詩焉

送歐大行還朝

鴨綠江頭送櫂聲東風吹淚若為情人間離別傷今日
天上音容隔此生衡浦鴈迴驚遠夢洞庭春盡渺歸程
遙知萬里相思處南斗橫斜片月明

朴淳一首

淳官吏曹判書

太平樓次歐公韻

來遊萬里魂應斷獨倚青冥思更賒天濶楚鄉飛客夢
路窮蓬海駐仙查山連睥睨雲長暝春半池塘草欲花
簾外夕陽看漸沒消愁惟有醉流霞

李珣

二首

珣德水人官議政府右贊成

詩話吾鄉蔡陽黃公以編修使朝鮮在萬厯十
年八月自珣以下三人暨許狀元壽皆充館伴
也者

辱編修黃公示沿途之作賦呈

丁年行役記吾曾
遼薊修途客念憑
歷歷道邊孤店月
依依天上早朝燈
身回蝸殼何由轉
班入蛾眉不再能
玉署新詩分物色
瑤臺指點一層層

送黃公還朝

長川冰雪覆寒沙
此日愁聞入塞笳
兩地雲泥分席上
一江南北即天涯
徒勞永夜游仙夢
漸遠明河貫月查
珍重詩篇兼贈處
媿將燕石報瓊華

金 瞻 一首

瞻官吏曹佐郎

送別正使黃公還朝

月落關城鼓角鳴
星輶夙駕向神京
長江自昔分南北
兩地從今隔死生
接塞凍雲迷別路
亂山晴雪照行旌
那堪獨夜龍灣館
愁對寒燈夢不成

高敬命 一首

敬命官司瞻寺僉正

別正使黃公

好音無路托西歸心逐仙查自奮飛
鴨水寒波添別淚鵲岑晴雪點征衣
謾將便面藏懷袖何計承顏御勒韉
匏繫海濱身已老百年形影欲誰依

柳根一首

根字晦夫狀元自號隱屏居士有西垞集

詩話蘭嵎諸公以萬厯丙午使東藩柳晦夫李
孝彥許端甫為館伴公攜有唱和詩卷歸墨蹟
今存予家

萬曆丙午五月送朱蘭岵太史還朝

玉節東來鳳詔頒，暮春江上乍承顏。
高懷獨出形骸外，雅賞長存水石間。
目斷未堪魂夢遠，形留只得鬢毛斑。
相思別後如明月，萬里清光不可攀。

李好閔 一首

好閔字孝彥探花樞相有五峰書巢集

郊院別席

西郊菡萏綠盈池，折得芳華贈別離。
此去金臺情不斷，

寸心真似藕中絲

許 筠 三首

筠舉進士第一萬歷壬午官成均司成

熊州引

一作牽
情引

熊州樓觀飛雲外白簡霜威凌皐蓋組練三千引繡衣
羅裙二八鳴珠帶九華之帳香氤氲寂寂瓊樓午夜分
亭里佳人嬌薦枕巫山仙子渺行雲牽情夢罷看歸路
別恨迢迢隔烟霧妾心苦苦作藕中絲郎意何如荷上露

錦水東西楊柳新往來愁殺斷腸人欲將心事寄青鳥
芳草年年空復春

謝編修黃公惠詩扇

越縑傳輕箴良工制作勞古藤分剡曲寒竹截湘皋灑
落留清什飄揚動彩毫書因逸少重價為謝安高自得
雙金贈還同一字褒年年火雲日長是憶仙曹

奉別正使黃公

迢遞飛旌入漢關鵬江晴雪展冰紉仙蹤已隔雲霄外

晤語猶存夢寐間中歲不堪頻送客此生難卜再承歡
空餘一握蒲葵扇分得清風兩袖還

許筠三首

筠字端甫筠之弟與兄皆舉進士第一自號白

月居士

送參軍吳子魚還天朝

國有中外殊人無夷夏別落地皆弟兄何必分楚越肝
膽每相照冰壺映寒月倚玉覺我穢唾珠復君絕方期

久登龍遽此成離訣關河路險巖秋郊方蠲熱此去慎
行休毋令阻回轍東陲尚用兵海嶠日流血須憑魯連
子却秦掉寸舌勿嫌九夷陋勉徇壯夫節

陪吳參軍子魚登義城

平野垂天末長江接海流雨餘多牧笛風急少行舟獨
鶴盤雲去雙鳬就渚浮相憐無限意空憶仲宣樓

晚詠

重簾隱映日西斜小院回廊曲曲遮疑是趙昌新畫就

竹間雙鶴坐秋花

金尚憲

四首

尚憲字叔度有朝天錄

聞柝

擊柝復擊柝夜長不得息何人寒無衣何卒饑不食豈
是親與愛亦非相知識自然同袍義使我心肝惻

九日

黃縣城邊落日朱橋驛裏重陽菊花依然笑客鬢髮又

度秋霜

早春

水際城邊野馬飛
漸聞宮漏晝間稀
東風日日靡蕪綠
塞北江南總憶歸

初至登州

南商北客簇沙頭
畫鷁青簾幾處舟
齊唱竹枝聯袂過
滿城明月似揚州

崔澥 二首

澥字彥沉海州人進士有楊浦集

李栗谷云彥沉詩似丹穴

鳳雛聲纔出穴已足驚人讀之風露爽然殆非食烟火人語置之盛唐詩中亦無媿也鄭經

世云彥沉信口吐詞皆成瓊屑任叔英云彥沉服膺盛唐其詩清越俊逸

詩話彥沉八齡能詩年十八中進士二十二而沒嘗輕衫幅巾登鏡浦臺倚柱而吟大書于壁曰蓬萊一八三千年銀海茫茫水清淺驚笙今日獨飛來碧桃花下無人見國中疑為真仙許葑愛而和之其逝也李廷龜申欽鄭協李綏祿趙繼韓具窵韓浚謙皆賦詩以悼窵詩有云楊浦烟花三月酒匡山風雪十年燈句亦自佳

春日

楊柳依依江水生杏花如雪落無聲青霞卷盡畫樓出
中有玉人吹玉笙

贈人

碧溪哀玉響楓林山水孤懷恣遠尋仙子不來秋已暮
古樓斜日獨登臨

李廷龜

一首

廷龜號栗谷

崔彥沉輓詩

有友今亡矣無端夢見之長尋臨訣語獨紀贈行詩宛
爾龍蛇字森然玉雪姿青山一坏土衰白淚雙垂

明詩綜卷九十四